

- प्रधानमंत्री नरेन्द्र मोदी लोगों सँ आवता त्यौहारी सीजन मांय वोकल फॉर लोकल रे मंत्र ने याद राखता थकां आं ने देशी उत्पादां रे साथे मणाणे री अरज करी हैं
- मुख्यमंत्री भजनलाल शर्मा कयो—जनकल्याणकारी योजनावां रो फायदो हर पात्र मिनख तांई पहुँचाणो सरकार री प्राथमिकता हैं
- प्रदेश मांय जीएसटी बचत उत्सव रे तैत जनजागरूकता रा कार्यक्रम राख्या जा रिया हैं
- एशिया कप टी-20 क्रिकेट रे खिताबी मुकाबले मांय आज भारत अर पाकिस्तान री टीम आमे—सामे व्हेलीं

000

प्रधानमंत्री नरेन्द्र मोदी लोगों सँ आवण वाळे त्यौहारां रे मौसम मांय वोकल फॉर लोकल रे मंत्र ने याद राखता थकां वांणे स्वदेशी उत्पादां रे साथे मणाणे री अरज करी हैं आकाशवाणी सँ मन की बात कार्यक्रम री 126वीं कड़ी मांय आज श्रोतावां रे साथे आपरा विचार साझा करता थकां वणा कयो कि आवण वाळा दिनां मांय केई त्यौहार है अर भारतीय उत्पादां ने खरीदणे सँ पिरवार मांय खुशियां बढ़ जावेलीं श्री मोदी कयो के देश मांय तैयार उत्पादां ने खरीदणे सँ कारीगरां री मेहनत रो सम्मान व्हे अरयुवा उद्यमियां रे सपना ने उड़ान भी मिलें

.....
श्री मोदी कयो के त्यौहार रे मौसम रे चालता केवल घर ही नहीं, बल्कि सड़कां, पड़ोस, बाजार अर गांव री भी साफ—सफाई माथे ध्यान दियो जावणो चाहिजें आवता दो अक्तूबर ने गांधी जयंती रे बारा मांय श्री मोदी कयो के महात्मा गांधी हमेशा स्वदेशी ने अपणाणे माथे जोर दियो, जिण मांय खादी सब सँ खास हीं

.....
प्रधानमंत्री कयो के आज स्वतंत्रता सेनानी भगत सिंह अर गायिका लता मंगेशकर री जयंती होणे रे कारण मन की बात री आ कड़ी घणी खास हो गयी हैं

.....
श्री मोदी कयो के अबे छठ पूजा एक वैश्विक उत्सव मांय बदल री हैं वणा कयो के सरकार इण महापर्व ने यूनेस्को री सांस्कृतिक धरोहर सूची मांय भेलो करणे रो जतन कर री हैं इण सूची मांय भेलो होणे सँ दुनियाभर रा लोग छठ पूजा री भव्यता अर दिव्यता रो अनुभव कर सकेलां

श्री मोदी कयो के अबे कारोबार सँ ले र खेल जगत तक अर शिक्षा सँ लेर विज्ञान तांई — हर खेतर मांय बेटियां आपरी पिछाण बणा री हैं वणा नौसेना री दो बहादुर अधिकारी लेफ्टीनैंट कमांडर दिलना अर रूपा री कामयाबी रो जिकर कर्यो जिको नाविक सागर परिक्रमा रे चालता आठ महीना तांई समुद्र मांय जातरा करती रहीं प्रधानमंत्री पूरे देश मांय आपरी पिछाण बणावण वाळा असम रा लोकप्रिय गायक जुबिन गर्ग रे अचानक निधन माथे भी शोक जतायें

वणा कयो कि जुबिन रो असम री संस्कृति सँ गहरो लगाव हो अर वां रो संगीत आवण वाळी पीढ़ियां ने मंत्रमुग्ध करतो रेवेलां श्री मोदी देशवासियां ने दशहरा अर दीपावली री शुभकामनावां दीं

प्रदेश मांय भी प्रधानमंत्री रे मन की बात कार्यक्रम ने लेर खासो उच्छास निजर आयों मुख्यमंत्री भजन लाल शर्मा आज जयपुर थापित आपरे रेवास माथे आमजन रे साथे मन की बात कार्यक्रम मांय प्रधानमंत्री रे संबोधन ने सुण्यो वठी ने प्रदेश भाजपा मुख्यालय मांय भाजपा प्रदेशाध्यक्ष मदन राठौड़ पदाधिकारियां रे साथे प्रधानमंत्री रे मन की बात कार्यक्रम ने सुण्यो वणा कयो के आज मन की बात कार्यक्रम मांय प्रधानमंत्री नरेन्द्र मोदी देशवासियां ने प्रेरणा सूं भर दियो सवाईमाधोपुर जिला रा शहरी अर ग्रामीण खेतर मांय मन की बात कार्यक्रम ने घणी तादाद मांय लोगां सुण्यो वठी ने पाली मांय मन की बात रे 126वें एपिसोड ने सुण र लोगां स्वदेशी उत्पादां ने अपणाणे रो संकल्प लियो सिरौही जिला मांय भी न्यारा न्यारा बूथां माथे मन की बात कार्यक्रम ने आमलोगां अर भाजपा कार्यकर्ताओं ने सुनां जिला थापित प्रदेश रा सब सूं ऊंचा पोलिंग बूथ शेर गांव मांय भी ग्रामीण मन की बात कार्यक्रम ने सुण्यां

000

मुख्यमंत्री भजनलाल शर्मा कयो कि म्हारी प्राथमिकता है कि कोई भी पात्र व्यक्ति केन्द्र अर राज्य सरकार री योजनावां रे लाभ सूं वंचित नी रेवें श्री शर्मा आज जयपुर मांय मुख्यमंत्री रेहवास माथे सांगानेर विधानसभा खेतर रा लोगां ने सम्बोधित कर रिया हां वणा कयो कि प्रधानमंत्री नरेन्द्र मोदी रे जन्मदिन रे मौके माथे 17 सितंबर सूं सरू व्ही सेवा पखवाड़ा मांय आपां सगळा आसे-पासे रे लोगां ने चिन्हित करता व्हीया योजनावां सूं जोड़ां

000

मुख्यमंत्री भजनलाल शर्मा आज डीग रे गुहाना मांय श्री जड़खोर गौधाम मांय राख्यी ज्या श्रीकृष्ण बलराम गौ-अराधना जळसे मांय शिरकत करी वणा बिहारी मिन्दर मांय दर्शन कर गौशाळा मांय गाय री पूजा-अर्चना करी अर भागवत कथा सुणीं इण मौके माथे मुख्यमंत्री कयो के राज्य सरकार गौवंश ने बचावण अर बधावण खातर संकल्पित हैं वणा कयो कि राज्य सरकार इण बरस बजट मांय प्रदेश रा लघु अर सीमांत काश्तकारां ने बैलां सूं खेती करणे माथे 30 हजार रुपया हर बरस देणे रो प्रावधान क्यो हैं

इण सूं पैली मुख्यमंत्री प्रतापगढ़ पहुंच्यां वणा अंबा माता का खेड़ा मांय पैली आळा मंत्री नन्दलाल मीणा री पार्थिव देह माथे फूल चढार श्रद्धांजलि दीं इण रे चालता उपमुख्यमंत्री डॉ. प्रेमचंद बैरवा अर सहकारिता राज्य मंत्री गौतम दक भी मौजूद रियां भाजपा रा आला नेता अर पैली आळा मंत्री श्री मीणा री लम्बी बीमारी रे पाछे काले अहमदाबाद रा एक सफाखाना मांय निधन व्हे ग्यो हां

0000

प्रधानमंत्री नरेंद्र मोदी जीएसटी बचत उत्सव री घोषणा करी हीं 22 सितम्बर सूं सरू व्हीयो ओ उत्सव समाज रा सगळा तबकां ने फायदो दे रह्यो हैं जीएसटी सुधार भारत री अप्रत्यक्ष कर प्रणाली ने सरल बणाणे री दिशा मांय एक खास कदम हैं आं सुधारां सूं चीजां अर सेवावां माथे टैक्स कम व्हीयो है अर लोग इण रो फायदो ले रिया हैं इण री इण कडी मांय प्रदेश मांय न्यारा न्यारा ठोडां जीएसटी बचत उत्सव रे मार्फत जनता ने जागरूक करयो जा रह्यो हैं आज पाली मांय वाणिज्य कर महकमा री कानी सूं जागरूकता कार्यक्रम राख्या गयां इण रे चालता चौराहां माथे पोस्टर बैनर लगाया गया अर रैली निकाळी ज्यीं वठी ने सवाईमाधोपुर मांय केंद्रीय संचार ब्यूरो, क्षेत्रीय कार्यालय कानी सूं डूंगरी मांय खास स्वच्छता ही सेवा अर जीएसटी सुधार बचत उत्सव माथे खास जागरूकता कार्यक्रम राख्या गयां इण कार्यक्रम मांय स्वच्छता ही सेवा अभियान, केंद्र सरकार री न्यारी न्यारी जनकल्याणकारी योजनावां माथे चर्चा करता थकां जीएसटी बचत उत्सव रा बारा मांय विस्तार सूं जाणकारी दीं कार्यक्रम री सरूआत मांय स्कूली टाबर स्वच्छता रो संदेश देता व्हीया रैली भी निकाळी इण मौके माथे स्थानीय जनप्रतिनिधि अर न्यारा न्यारा महकमा रा अहलकार, कर्मचारियां रे साथे स्थानीय लोग भी मौजूद रियां जैसलमेर मांय जीएसटी बचत उत्सव अभियान रे तैत शहर रा व्यापारियां अर उपभोक्तावां ने जीएसटी सुधारां रा बारा मांय जाणकारी दी जा रही हैं उच्छव मांय जनप्रतिनिधि अर अहलकार भी आप आप री सहभागिता निभा रिया हैं सिरौही मांय जीएसटी बचत उत्सव रे तैत जनजागरण अभियान चलायो जा रियो है और ब्यौरो म्हाणा खबरनवीस सूं-

000

जयपुर मांय आज ग्रीन फिट इंडिया मैराथन राखी ज्यीं उपमुख्यमंत्री दिया कुमारी इण मैराथन ने विद्याधर नगर खेतर सूं रवाना क्यो इण मौके माथे उपमुख्यमंत्री सगळा सूं स्वस्थ जीवनशैली अपणाणे अर साफ-सफाई राखणे री अरज करी वणा लोगां सूं सिंगल यूज प्लास्टिक ने इस्तेमाल नी करणे री अरज भी करी साथे ही लोगां ने सेवा पखवाड़ा रे चालता सेवा भाव सूं काम करणे री अरज करी

000

कोटा रा आनंदपुरा थाना खेतर मांय एक बहुमंजिला इमारत रा एक फ्लैट मांय आग लागणे सूं दो टाबरां री मौत व्हे गयीं हादसा रे बखत दोन्यू टाबर फ्लैट मांय ऐकला सो रिया हां भवन मांय धुओं उठता देख र पडौसी दरवाजो तोड़ र टाबरां ने बारे निकाळ्यो अर सफाखाना पहुंचायो, जटै डाक्टर वां ने मृत घोषित कर दियों जानकारी रे मुजब मरण वाळा दस वर्षीय वीर टीवी सीरियलां मांय बाल कलाकार रे रूप मांय काम करतो हों शरुआत री जांच मांय आशंका जताई जा री है कि शॉर्ट सर्किट रे कारणे फ्लैट मांय आग लाग गयी जिण सूं धुओं भरीजणे रे कारण वां री दम घुटर मौत व्हे गयीं

0000

उत्तर पश्चिम रेलवे रा चारु मण्डला मांय रेल मारग ने कवच फोर पाइंट ओ प्रणाली सूं लैस करयो जावेलां इण मांय जोधपुर मंडल भी भेलो हैं इण योजना माथे 23 सौ करोड रूप्या खर्च कर्या जावेलां ध्यान जोग है के टक्करोधी कवच प्रणाली रो विकास 2015 मांय सरु व्हीयों इण प्रणाली रा तीन बरसां सूं बत्ती बगत ताई घणी जांच करणे रे पाछे लागू करणे री प्रक्रिया सरु व्ही

000

एशिया कप टी-20 क्रिकेट मांय आज भारत अर पाकिस्तान रे बीच खिताबी मुकाबलो व्हेलां ओ फाइनल मुकाबलो रात 8 बजे सूं दुबई मांय खेल्यो जावेलां एशिया कप रा 41 बरस रे इतिहास मांय ओ पहलो मौको है, जदे भारत अर पाकिस्तान री टीमां आमे-सामे व्हेलीं भारत अबे ताई आठ बार एशिया कप रो खिताब आपरे नाम करवा चुक्यो हैं

0000

क्रांतिकारी स्वतंत्रता सेनानी भगत सिंह री 118वीं जयंती माथे आज देश वां ने सिरधापूर्वक याद कर रियो हैं भगत सिंह रो जनम बरस 1907 मांय आज ही रे दिन पंजाब रा लायलपुर ज़िला रा बंगा गाँव मांय व्हीयो हो जिको अबे पाकिस्तान मांय हैं मुख्यमंत्री भजनलाल शर्मा भी माँ भारती रे खातर सर्वस्व बलिदान देवण वाळा शहीद भगत सिंह री जयंती माथे वां ने नमन करयो हैं इण मौके माथे राज्य रा न्यारी न्यारी जगावां माथे श्रिद्धाजंलि सभावां राखी ज्यीं चूरु जिले रे लालासर गांव मांय वां री मूर्ति रो अनावरण करयो गयो सवाईमाधोपुर अर करौली जिला रा हिण्डौन मांय भी शहीद भगत सिंह ने श्रिद्धापूर्वक याद करयो गयो

000

प्रदेश सूं मानसून री विदाई रे साथे ही गर्मी रो असर बढ़ण लाग्यो हैं दिन मांय तेज गर्मी सूं जनजीवन प्रभावित हो रियो हैं जयपुर मांय तड़के सूं तेज गर्मी पाछे दोपहरां बादल छाया रेहणे सूं तापमान मांय मामूली कमी व्ही हैं इण रे चालता उदयपुर संभाग मांय बादळां री आवाजाही रे बीच तेज बरसात व्ही इण बीच मौसम केन्द्र जयपुर आज आवता चार-पांच दिनां रे चालता कोटा, उदयपुर, भरतपुर, जयपुर, अजमेर अर जोधपुर संभाग रे कुछेक ठोडां माथे बादळ गरजणे रे साथे बिरखा होणे री आस जताई हैं

000